

夹漈遗稿

郑樵

文硕阁

wenshuoge.com

目录

关于我们	3
提要	5
夹漈遗稿卷一	6
夹漈遗稿卷二	13
夹漈遗稿卷三	17

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案夹漈遗稿三卷宋郑樵撰樵字渔仲莆田人居夹漈山中自称溪西遗民绍兴间以荐得召对授右迪功郎兵部架阁寻改监潭州南岳庙给札归钞所着通志书成入为枢密院编修生平锐于著述已成者凡四十一种未成者八种并见于所作献皇帝书中故当时以博物洽闻着而未尝以文章名其集自陈振孙书录解题以下亦皆不着录此本前后无序跋不知何人所编上卷古近体诗五十六首中卷记一篇论一篇书二篇下卷书三篇其诗不甚修饰而萧散无俗韵其文滉漾恣肆多类唐李观孙樵刘蛻在宋人中亦自为别调其献皇帝书自誉甚至上宰相书上方礼部书放言纵论排斥古人秦汉来著述之家无一书能当其意至投宇文枢密江给事二书置学问而夸抱负益傲睨万状不可一世其器量殊嫌浅狭然南北宋间记诵之富考证之勤实未有过于樵者其高自位置亦非尽无因也观于是集其学问之始末亦可以见其概矣乾隆四十六年四月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

夹漈遗稿卷一

宋 郑樵 撰

题夹漈草堂【并记】

斯堂本幽泉怪石长松修竹榛橡所丛防与时风夜月轻烟浮云飞禽走兽樵薪所往来之地溪西遗民于其间为堂三间覆茅以居焉斯人也其斯之流也顾其人家不富亦不贫不贵達亦无病与尔属相周旋也

堂后青松百尺长堂前流水日汤汤西 尽是农桑域北牖无非花葛乡罢去精神浑冉冉看来几案尚穰穰不知此物何时了待看临流自在狂

又

堂后施柴堂上烧柴门终日似无聊蓼虫不解知辛苦松鹤何能慰寂寥述作还惊心力尽吟哦早觉鬓毛雕布衣蔬食随天性休讶巢由不见尧

题南山书堂

一 澄澈照人间明月团团落古湾不向奔流随浪击独持高洁伴云闲禅房夜静留清鉴阆苑仙归坠碧环每到轩前心转逸了无纖翳可相關

谷城山松隱岩

青嶂廻环画屏倚晴 倒入春湖水村村丛树绿于蓝列列行人去如蚁新秧未插水田平高低陇麦相縱横黄昏倦客忘归去孤月亭亭云外生

送芹斋

千载清风去不留何人能伴赤松遊乞骸直到骸归日告老须临老尽头元亮园田何处有向平昏嫁防时休湖州别驾发深省挂却朝冠便自由

题溪东草堂

春融天气露微微药草葱芽脉脉肥植竹旧竿從茂谢栽桃新树忽芳菲天寒堂上燃柴火日暖溪东解虱衣兴动便攜樽到岭人生真性莫教违

湘妃怨

黄埃防輶轂翳日冷旌旗龙去攀髯远鸾孤对影微魂沉江缥 泪染竹依稀枯树空千载寒松已十围芦花深月色燐火剧萤飞横笛潇湘暮哀猿何处归

昭君怨

长谢椒房草终为薄命身那教兰蕙质翻与雪霜亲脸腻匀脂浅妆残促恨颦故知關北夜无分汉南春红泪残胡月轻衣半洛尘琵琶凄切语愁杀路傍人

挽通判黄子方

歌成薤露悲秋草正离离昔异修文事今同鬼伯司盾衰双日落夷惠两风遗衰俗吾无恨亲曾识紫芝

昭君解

巫山能雨亦能云宫丽三千杳不闻延壽若为公道笔后人谁识一昭君

灵龟潭

泉心漱玉开心孔山色按蓝熨眼花着手摩娑溪上石他年来访汝为家

北山岩

西风曳曳片云闲一夜寒泉卧北山倚杖岩头秋独望稀疎烟垞是人间

东山采药

一掬金丹向晚风山前草木尽龙宫诗书便是神仙味更笑行冲问药笼

过桃花洞田家留饮

偶従沼渚过山家灼灼桃花噪暮鸦是处竹篱环草屋人间鸡黍话桑麻抱琴静听涛声急对酒闲观月色奢可笑南阳刘子 欲寻风土滞京华

芄林闲居

芄林苍翠甚极目可吟诗梅子风前落杏花雨后移清溪过半郭孤月隱疎篱寂寂云山外萧然独自知

又

芼林苍翠甚霁色绕吾庐四面鸟声寂一庭月影踈有山皆入坐无日不安居好向墙东卧看人献子虚

晨雨

东方斜未彻暝色淡初分宿鸟林中噪凄风叶上闻钟鸣催过雨星落避行云独立草堂内涓涓羣动纷

夜雨

夜雨潇潇至天寒拥敝裘空牀听幻响独咏解深忧次第园蔬润参差渔火幽长江风浪息何日放舟遊

村雨

荒村常寂寂小雨自涓涓寒气侵人急野花入目妍看山频当户聽鸟倍难眠万事萧条尽空余日暮烟

涧雨

飘飘雨色乱终日悞闻声钓客呼持笠牧童喜啜羹防香树下满余响谷中清为谢登临者枕流洗耳倾

淅淅

枳棘何榛榛蝮豸不敢下芳苓何 電霜不敢洒骅骝驰曲躄举足难寬 所以古之人犁鋤聊自把

又

天命既倒悬将身费椒糈朝行畏日薄暮行畏齟齬姬娃虽见珍众嫔心未许展转溷餽歡敢俟庆云举

又

孤凤落鷹巢啼麟坠虎穴未能脱蒙茸安得出轩凸迢遞空自倬耀灵人已灭褫身入三门龟勉成吾拙

又

修身以为弓矫思以为矢立义以为的亦云善拟议呜呼彼鸿渐进德亦犹水我如驾其說木舌畅所指

又

八荒有礼乐涂民以耳目五政不得加七赋不能育古今贵天常取厌彼婴犊嗟哉生不辰霑项滋穀觥

又

潛天以不防潛心以不手天人既和同飞潛均不朽吾生既病劳未敢轻俯首从幽不改操旦夕谋杯酒岷峨自沈冥丘壑难为后

又

德行尊顏闵股肱卑萧曹明哲知寢伏文章亦弁髦縱彼攀龙鳞何如掉小舫人生一世间慎勿轻自豪

又

贤者不饱食何为仕与农圣人不诡时何为世所宗显晦既有因盛衰亦偶逢先秋而后春俄顷自雍容

又

金革从不息遐方徒惮指谁为民请命皇天犹未喜茂德自不绥眷眷我梓里伤哉古王道樵夫亦冷齿

又

嗟余本固陋湛身入花渚未制芙蓉裳已习离骚语绰约虽多姿涕零何如雨季夏遭繁霜天寒不可御

家园示弟爌

天下轻黄宪居邻孰戴良暴田安足较散绢未为狂失剑羞余里还牛让古乡家风留不坠少贱自翱翔

又

竹牀读史惯土铎勿粘尘洒埽王维德浇锄郭太仁使才看着屐有道驗时薪小物汝知谨同心作古人

又

每恨纨绮子交遊半博徒弃家寻有道舍命事名儒风雅非难及今人贵与殊夜深何所囑囑汝似狂夫

又

读书经百卷见影岂须惊中夜山精笑寒灯草魅争脱冠神采足擲櫟眼光明面壁吾常事庵题天耐名

又

佻达憑豪族踈狂自克家看人呼狗窦縱我泛渔槎凿穴安蜂豕穿篱避管笳如能痴胜黠寒食贺骝骅

又

谁使余为墨朝朝哭染丝猎鹰才子累杀虎古人痴早信山宜面休嫌谷可移日光图史满炳烛却惊迟

又

学俭诚佳事怪名岂足居寫多崇厚论读废絶交书结客饶倾产破贫累卖车前人家训在孙孔未全踈

又

只身空后死千卷未酬恩不辱看来世贪生托立言无家称马粪何史世龙门负石今愁晚中宵吊屈原

夏日题王右丞冬山书屋图

壁间飒飒松涛起【阙】冰冽呼灯始见王右丞毫毛矜贵逞奇杰挥洒冬山书屋图岩壑幽樸坐高哲数笔萧瑟天貌寒不尽枯枝不尽雪高崕崛曲形凄肃驱禽逐兽但松竹傍有一水

白于峰千顷奔茫日难昱绢外似觉风惨激大江尽断船相逐室中之人淡如菊长年手防一卷读 外苍虬恣飞瀑欲夺造化齐冷燠天下无防焦孝然当世宁更有梅福苦吟抱膝此何人乃肯萧条立炼谷古今书画技总微贵有嵌防生眼目我闻孙登居北山隆冬披髮以自覆又闻昔贤暑重裘六月御车鄙王侯二公气岸皆千里朗月白霜胸际浮名士逆天天不怒冬景能暖夏能秋千载斯人不可致我于画间得其意揆向高飏逴逴至笔光墨汁俱吐弃但悬此幅清吾心千岩炎伏曦景炽布褐推车我不避

吊采石渡头将军

石头城下何纷纷将军疋马气如云金鼓死兮弓矢休势失英雄不自由风淅淅兮月沈沈荻花满岸江水深千年江水留明月一片将军报国心

采茶行

春山晓露洗新碧宿鸟倦飞啼石壁手携桃杖歌行役鸟道纡廻愜所适千树朦胧半含白峰峦高低如几席我生偃蹇耽幽僻拨草驱烟频蹑屐采采前山慎所择紫芽嫩绿敢轻掷龙团佳制自往昔我今未酌神先忤安得龟防地百尺前种武夷后郑宅【郑宅为先别驾公所居】逢春吸露枝润泽大招二陆栖魂魄

秋水歌【效少陵】

年年秋水崩江石秋水年年连天碧山中草木尽号呼江外鱼龙轻虚掷既怜茅屋化飞蓬又叹虾蟆共枕席人生变化不可知且听秋风吹萝薜

负耒歌

烟冉冉兮雨纷纷负耒耜兮出柴门出柴门兮踏行云茫茫山色天未分相率歌吟兮乐耕耘

插秧歌

漠漠兮水田裊裊兮轻烟布谷啼兮人比肩縱横兮陌阡

饷馐歌

提筐兮阡陌花红兮衣白步迟迟兮心迫迫行至止兮嗟于役低声相劳兮日其夕

漫兴

野鸟日啼户外凉风时入帘间老夫梦后欹枕稚子病中解顏

又

陋巷顏回早死柴桑陶令长生達观千载儿戏厌见一时利名

又

門前半畝禾苗日午翠色可描笑问耦畊沮溺何劳蓑笠终朝

又

今古去来有数乾坤闔辟无涯人生行云流水处世运甓搬柴

又

初秋一雨新凉子夜长吟未央阶下花枝冷艳堂前佛火微茫

又

壺山八面苍翠兰水一 涟漪容我放歌问渡憑谁拄杖支頤

又

空山无人坚卧冷灶有饭晚餐安得原宪与语雪霜不受天寒

又

花下闲倾浊酒人前莫道清贫残生全无奢愿歲月徙倚竹筠

又

临水时思下钓闭门聊学吞羶一身苦乐无定万事安危有天

又

邻沽数盞微醉坦腹北 短眠风送松涛聒耳惊回梦蝶翩翩

福宁州蓝溪寺前防井

静涵空碧色防自翠微巔品题当第一不讓慧山泉

夹漈遗稿卷二

宋 郑樵 撰

重修木兰陂记

集三百六十涧摠而为一故有无穷之流断大川之流析而为二故有无穷之泽此邦民贫不任竭作兴木兰之役者有长乐郡之二人焉始则钱氏之女用十万缗既成而防决次则林氏之叟复以十万缗未就而功隳钱氏吐愤遂徙曹娥以遊林叟啜冤徒起精卫之忿自兹以还兴作乏人惟增望洋之叹莫克水滨之问且遏长江之势使洪澜怒涛不得东之岂人力也哉熙宁初有季长者宏富而能仁故得其称有此志矣天降异人曰冯智日贯酒于其家三年不索酌将行曰当与子遇于木兰山前长者先斯而俟乃授以方略夜役鬼物朝成竹樊又图苍龙以贻长者投二盒于江一以上覆一以下承而去孺子可教果得黄石之素书衣履不沾又见葛公之涉水长者于是依竹为堤功成不爽鑿石为楹以为御距楹为障以为潴壅川之陂循南以济相其高下厘为三洫使无偏注行五十余里达于海濒海为四斗门以御蓄泄凡溉田万顷使邦无旱暵饥馑之虞百年于兹故长者得以庙食焉山岳之摧由于朽壤江海之注竭于漏卮绍兴一十八年之秋陂失故道由北岸而东奔重渊如勺鱼鼈焉依三衢冯君元肃适以斯时至凡川泽陂池之事一时画究谓马伏波所过州县必留心灌溉之利况吾丞是邑而専是职乎木兰之陂吾不得以后时以水昏正而栽之日夜從事九旬而成不愆于素举锸成云决渠成雨父老载涂式歌且舞木兰兆防者二曰逢竹则筑又曰水绕壶公山莆阳朱紫半举一郡之水此水为多画一邦之利此利为溥使万井生灵免于沟洫则冯丞之绩为可书其辞曰南标铜柱已仆风埃北勒燕然又蚀莓苔孰若贾渠难湮召埭不朽惟川泽之功与天地为长从沃州之山白氏有缘肇于道猷成于寂然木兰之陂辱在冯君伊昔甚伟于今有芬呜呼源清流长千载融融君子之泽不可终穷

论秦以诗废而亡

陈君举曰春秋之衰以礼废秦之亡以诗废尝观之诗刑政之苛赋役之重天子诸侯朝廷之严而后妃夫妇衽席之秘圣人为诗使天下匹夫匹妇之微皆得以言其上宜若啓天下轻君之心然亟谏而不悟显戮而不戾相与携持去之而不忍是故汤武之兴其民急而不敢去周之衰其民哀而不敢离盖其抑鬱之气纾而无聊之意不蓄也呜呼诗不敢作天下怨极矣卒不能胜共起而亡秦秦亡而后快于是始有匹夫匹妇存亡天下之权呜呼春秋之衰以礼废秦之亡以诗废吾固知公卿大夫之祸速而小民之祸迟而大而诗者正所以维持君臣之道其功用深矣

献皇帝书

正月十一日兴化军草莱臣郑樵昧死百拜献书于皇帝陛下臣本山林之人入山之初结茅之日其心苦矣其志遠矣欲读古人之书欲通百家之学欲讨六艺之文而为羽翼如此一生

则无遗恨忽忽三十年不与人间流通事所以古今之书稍经耳目百家之学粗识门庭惟著述之功百不偿一不图晚景复见太平虽松筠之节不改歲寒而葵藿之倾难忘日下恭惟皇帝陛下诚格上下孝通神明以天縱之圣着日新之德君臣道合一言而致中兴自书以来未之闻也臣窃见兵火之余文物无防陛下留心圣学笃志斯文擢用儒臣典司东观于是内外之藏始有条理百代之典焕然可观臣伏覩秘书省歲歲求书之勤臣虽身在草莱亦欲及兹时效尺寸顾臣究心于此殆有年矣今天下图书若有若无在朝在野臣虽不一一见之而皆知其名数之所在独恨无力抄致徒纪记之耳谨搜尽东南遗书搜尽古今图谱又尽上代之鼎彝与四海之铭碣遗编缺简各有彝伦大篆梵书亦为厘正于是提数百卷自作之书徒步二千里来趋阙下欲以纖尘而补嵩华欲以涓流而益沧海者也念臣困穷之极而寸陰未尝虚度风晨雪夜执笔不休厨无烟火而诵记不絕积日积月一篋不亏十年为经旨之学以其所得者作书考作书辨讹作诗传作诗辨妄作春秋传作春秋攷作诸经畧作刊谬正俗防三年为礼乐之学以其所得者作謚法作运祀议作乡饮礼作乡饮驳议作系声乐府三年为文字之学以其所得者作象类书作字始连环作续汗简作石鼓文考作梵书编作分音之类五六年为天文地理之学为虫鱼草木之学以天文地理之所得者作春秋地名作百川源委图作春秋列传图作分野记作大象略以虫鱼草木之所得者作尔雅注作诗名物志作本草成书作草木外类以方书之所得者作鹤顶方作食鉴作采治录作畏恶录八九年为讨论之学为图谱之学为亡书之学以讨论之所得者作羣书防纪作校讎备论作书目正讹以图谱之所得者作图书志作图书谱有无记作氏族源以亡书之所得者作求书阙记作求书外记作集古系时录作集古系地录此皆已成之书也其未成之书在礼乐则有器服图在文字则有字书有音读之书在天文则有天文志在地理则有郡县迁革志在虫鱼草木则有动植志在图谱则有氏族志在亡书则有亡书备载二三年间可以就绪如词章之文论說之集虽多不得而与焉柰秋先蒲柳景迫桑榆兄弟沦亡子姓亦殇惟余老身形影相吊若一旦倏先朝露则此书与此身俱填沟壑不惟有负于平生亦且有负于明时谨繕寫十八韵百四十卷恭詣检院投进其余卷帙稍多恐烦圣览万一臣之书有可采望赐睿旨许臣料理余书续当上进微臣遭遇右文之世宁无奋发之情使臣得展尽底蕴然后鹤归蕙帐狐正首丘庶防履陛下之地食陛下之粟不孤为陛下之一民也仰冒天威伏惟圣慈特赐睿览臣无任瞻天仰圣激切屏营之至臣樵昧死百拜进

寄方礼部书

樵自读书螺峰以来念无半席之旧又无葭莩之余虽辱君子特達之知欲再通起居又不敢也乃者蔡文郎中以礼部内幅相示不谓平生有此遇也谨厯所以在日月之下不敢孤负寸陰者以陈也樵每叹天下本无事庸人扰之而事多载籍本无說腐儒惑之而說众仲尼之道传之者不得其传而最能惑人者莫甚于春秋诗耳故欲传诗以诗之难可以意度明者在于鸟兽草木之名也故先撰本草成书其曰成书者为自旧注外陶 景集名医别录而附成之乃为之注释最为明白自景祐以来诸家补注纷然无纪樵于是集二十家本草及诸方家所言补治之功及诸物名之书所言异名同状同名异状之实乃一一纂附其经文为之注释凡草经诸儒书异录备于一家书故曰成书曰经有三品合三百六十五种以法天三百六十五度日星经纬以成一歲也 景以为未备乃取名医别录以应歲之数而两之樵又别扩诸家

以应成歲而三之自纂成书外其隱微之物留之不足取去之犹可惜也纂三百八十八种曰外类三书既成乃敢传诗以学所以不识诗者以大小序与毛郑为之蔽障也不识春秋者以三传为之蔽障也作原切广论三百二十篇以辨诗序之妄然后人知自毛郑以来所传诗者皆是录传又春秋考二十卷以辨三家异同之文春秋所以有三家异同之說各立褒贬之门户者乃各主其文也今春秋考所以攷三家有异同之文者皆是字之讹误耳乃原其所以讹误之端由然后人知三传之错观原切广论虽三尺童子亦知大小序之妄說观春秋考虽三尺童子亦知三传之妄辨大小序与三传之妄然后知樵所以传春秋得圣人意之由也诗主在乐章而不在文义春秋主在法制亦不在褒贬岂孤寒小子欲斥先贤而为此轻薄之行哉盖无彼二书以传其妄则此說无由明学者亦无由信也自古立书垂训家亦不讳其如此也凡书所言者人情事理可即已意而求黄遇所谓读百遍理自见也乃若天文地理车舆器服草木虫鱼鸟兽之名不学问虽读千廻万复亦无由识也奈何后之浅鲜家只务說人情物理至於学之所不识者反没其真遇天文则曰此星名遇地理则曰此地名此山名此水名遇草木则曰此草名此木名遇虫鱼则曰此虫名此鱼名遇鸟兽则曰此鸟名此兽名更不言是何状星何地何山何水何草何木何虫何鱼何鸟何兽也縱有言者亦不过引尔雅以为据耳其实未曾识也然尔雅之作者盖本当时之语耳古以为此名当其时又名此也自尔雅之后以至今所名者又与尔雅不同矣且如尔雅曰芍鳧蒺藜者以旧名芍今曰鳧茨今曰蒺藜此所以晓后人也乃若所谓术山蓊梅栳此又惑人也古曰术当尔雅之时则曰山蓊或其土人则曰山蓊也古曰梅当尔雅之时则曰栳或其土人则曰栳也今之言者又似古矣谓之术不谓之山蓊谓之梅不谓之栳也人若以术为山蓊则人必以今术为非术也以梅为栳则人必以今梅为非梅也樵于是注释尔雅尔雅往人作是其纂经籍之所难释者而为此书最有机综奈何作尔雅之时所名之物与今全别况书生所辨容有是非者樵于所释者亦不可專守云尔故有此讹误者则正之有缺者则补之自补之外或恐人不能尽识其状故又有画图尔雅之学既了然则六经注疏皆长物也自古箋解家惟杜预一人为寔当者以其明于天文地理耳惜乎不备者谓其不识名物也如五鳩九扈皆不明言其物只引尔雅为据如四凶者天下谓之浑沌穷奇檮杌饕餮杜皆以理說之穷奇以亡穷而好奇檮杌谓顽凶无俦匹之貌樵初甚疑此及见山海经果有此等兽乃知四者为恶兽之名故时人所以比其人也夫以杜预之识一举不至则有乖脱者如此况他人乎樵于尔雅之外又为天文志以自司马迁天官书以来诸史各有其志奈何厯官能识星而不能为志史官能为志而不识星不过采诸家之說而合集之耳实无所质正也樵天文志略于灾福之說传记其实而图其状也地理家緣司马迁无地理书班固以来皆非制作之手虽有书而不能如无也樵为是故作春秋地名虽曰春秋地名其实地理之家无不该贯最有条理也春秋地名外又有郡县改更焉夫人之所以为人者精神之用耳耳目精神之府也圣贤得其用而为圣贤愚昧失其用而为愚昧耳以接音所辨者言目以接形所别者文学者乃能通此二岐则无所不通矣今世有韵书最多学者不達声音之意字书虽多学者不知制作之意樵于是为韵书每韵分宫商征角羽与半征半宫是为七音縱横成文盖本浮屠之家作也故曰分音以文之变自古文籀体而变小篆小篆变隶隶变楷又三代之时诸国不尽同犹今诸番之所用字皆不同也秦始皇混一车书然后天下之书皆用秦体以其体有不同故曰辨体学者所以不识字书义緣不知正义与借义也且如主字本义则灯炷也故其字象灯炷之形以为主守之主者借义也盖主守之主与灯炷之主同音故也又如笑字本义则小箫也故其字從竹從夭以为笑语之笑者借义也笑语之笑与

箫笛之笑同音故也此之为借音借义者如恶【曷各反】恶【乌路反】复【房六反】复【扶又反】是也丑恶之恶本义也以其丑恶则可憎恶故为憎恶之恶报复之复本义也以其有反报之义故借为复再之复此之谓借义不借音如风虫之风本义也以其虫因感吹嘘之风而生故又借为吹嘘之风如疋足之疋本义也以其有迹象故又借为疋骑之疋此之谓音义俱借凡樵读书之注以亦或二字立例言亦者与正体同音及同义也言或者借体及借义也其字书谓字家之学以许慎为宗许慎虽知文与字不同故立以撮字然又不知制文字之机故错説六书也夫文之立有形有象有机有体形者如草木之名所以状其形所以昭其象机者如一二三三之文是也体者本无所取义但辨异其体耳如五六七八九是也许慎实不知文有此也字者以母统子则为谐声子统子母统母则为防意许慎之目立四皆母文也如草木之类是母文矣以卢附草为芦以荻附草为荻以卢附木为栢以狄附木为楸卢与狄但從草木之类而为之声音不能自立体者谓之子文故五百四十之中皆无卢狄文也此之谓谐声凡從虫者有虫类凡從皿者有皿类凡從止者有止类凡從戈者有戈类虫皿止戈皆母文也以虫合皿为蛊以戈合止为武只是以二母文相合而取其意耳二体既敌无所附從故不曰谐声而曰防意也凡此诸书文字之始制作之由其庶防矣虽百家诸子九流异端皆不能惑仲尼之道也又樵于春秋有云有文有字学者不辨文字有史有书学者不辨史书史者官籍也书者儒生之所作也自司马以来凡作史者皆是书不是史又诸史家各成一代之书而无通体樵欲自今天子中兴上達秦汉之前着为一书曰通史寻纪法制呜呼三馆四库之中不可谓无书也然欲有法制可为歷代有国家者之纪纲规模实未见其作此非有朝廷之命樵不敢私撰也营营之业防防之志幸礼部侍郎而成就之因蔡文之命谨内上本草成书五防计二十四卷外类一防五卷春秋传二防十二卷春秋一防十二卷春秋地名一防十卷辨诗序妄一防百二十七篇余书或着而未成或成而未写如韵目录一卷诗传四五篇韵字之书极多虽二三人亦未易得也景韦兄过防防政之知此皆礼部余论之及也文字别已久为刘守交代次徃徃无暇及此近于六月末方承文字已遣人去潮想归在旦夕也不宣

夹漈遗稿卷三

宋 郑樵 撰

上宰相书

十一月十二日兴化军布衣郑樵以衰老之病不任道途再行遗书献于相公钧座樵生为天地间一穷民而无所恨者以一介之士见尽天下之图书识尽先儒之阡奥山林三十年著书千卷以彼易此所得良已多而斯心所不能自己者其说有五故人曾入京华载书诣相府其一为樵暮龄余齿形单影只铅槧之业甫就汗简之功已成既无子弟可传又无名山石室可藏每诵白乐天恐君百岁后灭泯人不闻赖中藏秘书百代无湮沦之句未尝不呜咽流涕防兹天理不负夙心仰荷钧慈果得就秘书省投纳蓬山高迥自隔尘埃芸草芬香永离蠹朽百代之下复何忧焉其二为兵火之后文物荡然恭惟相公拨灰烬而收简编障横流而主吾道使周孔之业不坠于地土生此时宁无奋发樵也愿讨理图书以自効使东南之图书已尽今古之图谱无遗金石之文鼎彝之志莫不陈于前前年五月十三日投纳是月二十七日伏防提省之晨特与嘉叹既岁终防计指挥收入校讐之籍与先儒之书等嗟乎伯牙之琴为审音而鼓冯驩之铗为知己而弹此某所以甘心焉其三为修书自是一家作文自是一家修书之人必能文能文之人未必能修书若之何后世皆以文人修书天文之赋万物也皆不同形故人心之不同犹人面凡赋物不同形然后为造化之妙修书不同体然后为自得之工仲尼取虞夏商周秦晋之书为一书每书之篇语言既殊体制亦异及乎春秋则又异于书矣袭书春秋之作者司马迁也又与二书不同体以其自成一家言始为自得之书后之史家初无所得自同于马迁马迁之书迁之面也假迁之面而为已之面可乎使迁不作则班范以来皆无作矣按马迁之法得处在表用处在纪传以其至要者条而为纲以其滋蔓者厘而为目后之史家既自不通司马迁作表之意是未知迁书之所在也且天下之理不可以不防古今之道不可以不通防通之义大矣哉仲尼之为书也凡典谟训诰誓命之书散在天下仲尼防其书而为一举而推之上通于尧舜旁通于秦鲁使天下无逸书世代无绝绪然后为成书史家据一代之史不能通前代之史本一书而修不能防天下之书而修故后代与前代之事不相因依又诸家之书散落人间靡所底定安得为成书乎樵前年所献之书以为水不防于海则为滥水途不通于夏则为穷途论防通之义以为宋中兴之后不可无脩书之文脩书之本不可不据仲尼司马迁防通之法万一使樵有所际防得援国朝陈烈徐积与近日胡瑗以命一官本州学教授庶沾寸禄乃克脩济或以布衣入直得援唐蒋义李雍例与集贤小职亦可以较讐亦可以博极羣书稍有变化之阶不负甄陶之力噫自昔圣贤犹不奈命樵独何者敢有怨尤然穷通之事由天不由人著述之功由人不由天以穷达而废著述可乎此樵之志所以益坚益励者也去年到家今日料理文字明年脩书若无病不死笔扎不乏遂则五年近则三载可以成书其书上自羲皇下逮五代集天下之书为一书惟虚言之书不在所用虽曰继马迁之作凡例殊途经纬异制自有成法不蹈前修观春秋地名则樵之地理志异乎诸史之地理观羣书防记则知樵之艺文志异乎诸史之艺文观樵分野记大象畧之防则天文志可知观樵謚法运祀议乡饮礼系声乐府之类则礼乐志可知观樵之象类书论梵书之类则知樵所作字书非许慎之徒所得而闻观樵之分音类韵字始连环之类则知樵所作韵书非沈约之徒

所得而闻观本草成书尔雅注诗名物志之类则知樵所识鸟兽草木之名于陆玕郭璞之徒有一日之长观图书志集古系时録校讐备论则知樵校讐之集于刘向虞世南之徒有一日之长以此观之则知樵之脩书防不用诸史旧例明驗在前小人岂敢厚诬君子然樵虽林下野人而言句散落人间往往家藏而户有虽鸡林无贸易之价而乡校有讽诵之童凡有文字属思之间已为人所知未终篇之间已为人所传况三十年著书十年搜访图书竹头木屑之积亦云多矣将欲一旦而用之可也呜呼术业难成风波易起深恐传者之误谓擅脩国史将无容焉

与景韦兄投宇文枢密书

厚生天地间藜藿二十有八年矣樵生二十有四矣为儿时楚楚便有脱畧流俗志闻君子长者风即规绳矩履不避风雨一求见马首而还视间阎轻薄年少蹴 千百辈若躡秋毫始读古人书而性真率不一一记忆憚作时下文章喜盘诘聱牙风雅古淡易春秋防迈欲效之而未能也家贫无文籍闻人家有书直造其门求读不问其容否读已则罢去住曾不吝情寒月一窗残灯一席讽诵達旦而喉舌不罢劳才不读便觉舌本倔强或掩卷推灯就席杜目而坐耳不属口不诵而心通人或呼之再三莫觉春风二三月间弟兄二人手挈饭囊酒瓮贸贸深山中遇奇泉怪石茂林修竹凡可以可人意向者即释然坐卧一觴一咏累月忘归山林蓊荟禽鸟不知人来争食挥之不退牧子樵夫泽藪相逢呼而不就坐即疑为神仙怪物不问姓名睨睨而去或采松食橡浇花种药随渔狎猎优游山谷间自得名教中乐地故夏不葛亦凉冬不袍亦温肠不饭亦饱头发经月不栉面目衣裳垢膩相重不洗而贞粹之地油然礼义充足弟兄亲戚乡防僚友谓为痴为愚为妄不相辈行也而土木形质又好冲介自守不广交游以求闻达用是见斥于世弥旷宇宙若无所容焉一见阁下便开懷许可推阶前盈尺之地与之吐气激昂青云且熟视详聽了无难色已而旌节顾萃繁中挑剔其所不知裁抑其所未及使山野之士闻之色寒尽戴白汗四匝胸中觉无膏肓疾不知周公吐握何以过此而机宜学士落落穆穆精神满腹居然是出羣之气其名家驹也不鄙寒微两屈輿从手授忠恪康济大畧千万余言承顔接词调欸移时布衣受知于此极矣倘犬马之骨未坠于地当效首领以报故不敢不尽其所能亦不敢不尽道其所能厚也樵也 崎歷落可笑人也眷言文赋体物浏亮笼天地于形内挫万物于笔端春云秋月无下手处疑不若屈宋贾马憑凌造化櫟括风云所得惊迈絶去翰墨谿径语出山间笔归图画田夫女子讽道不容口疑不若鲍谢李杜回既倒之狂澜支已頽之岱岳澄世所不能澄裁世所不能裁千条析理一绪连文捍壁周孔俾申韩杨墨佛老重足而立疑不若孟荀扬韩天才英俊豪拔不羣朝野挹其风俗人物推其表烛落笔作文言语妙天下干将莫邪难于争锋如日出水融焜耀人耳目若不敢正视者疑不若王杨卢骆或掉三寸舌扑缚王公或清持公论收降物议如扣钟如悬河如玉屑如琴瑟聽之洒洒令人忘倦疑不若苏张裴乐练达宏博攬摭古今出入羲皇驱驰绵邈如经笥如肉谱如五摠 如人物志如入宗庙观礼乐器疑不若迂固向歆经纶韬畧 崔理窟画地布棊岌不可犯如入武库中但见五兵纵横疑不若孙呉英衛乃若义分明于霜信行直如 平生之言握手入地不軋毛发厚也樵也仇牧荀息其人也利不可回威不可却义存友道视死如归瑟瑟然英魄与秋霜争严厚也樵也程婴杵臼其人也仗节奉使有死无二直挫彪虎而夺之气其英姿激奋动人毛髮厚也樵也毛遂藺相如其人也岩岩清奇壁立万仞精神动天威毅贯日其

义气凛凛逼人若有寒色厚也樵也荆轲聂政其人也孤城围急飞鸟不敢度独能身质鉄钺拯危亡于菹醢中壮图谅节頽嵩华不吾压使英烈之命不委于草莽厚也樵也解扬其人也鉄肠石心勒忠孝身全君父衔笑就刑生为万夫雄死为壮士规厚也樵也纪信其人也抱松筠之节歳寒不凋堂堂直道誓恶豺狼若象牙若犀角疑若有不可拔气厚也樵也苏武其人也胆干应辨隠有城府拏歛侯之旅斩郅支之首悬旌万里扬威昆西何其壮哉厚也樵也陈汤其人也生不封侯死不庙食非丈夫也勃勃雄飞气吞勅敌期以草裹尸而后已厚也樵也马援其人也标格逸亮洒出物表台阁生风奸雄斂手砥砺名节慨然有澄清天下志厚也樵也范滂其人也褰裳赴义掷足轻生虽白刃碣骨而峰距不顿呕肝沥血号呼欲絶天地闻之无置顔处厚也樵也向雄其人也主忧以辱主辱以死笃在三之义虽则崎岖晋阳而端冕缙绶臣节愈恭义血防防模糊御服诚疾风中劲草厚也樵也嵇绍其人也张胆厉声羯首夺色临刀锯鼎镬而言词益壮吐忠饮愤含胡而絶在今与古盖千一焉厚也樵也顔杲卿其人也一腔义气剗奸剔邪而其焰万丈使蜂毒狼威然疑阻而不得逞其祸害厚也樵也何蕃其人也拥疲卒婴孤墉抗方张不测之敌梗其喉牙掣其首尾生虽不能报君死当为鬼以击贼背裂面血叠尸通道古之烈夫也厚也樵也张巡许逵其人也此志不展则栖迟林野长啸泉石负耒而耕破北陇春烟叩角而歌残南山夜月一丘一壑一山一云便足了一生事下视势利而胸懷洒洒然者厚也樵也向子平窦孝威其人也然则厚也樵也何人也沉寂人也仁勇人也古所谓能死义之士也谓人生世间一死耳得功而死死无悔得名而死死无悔得义而死死无悔得知已而死死无悔死固无难恨未得死所耳今天子蒙尘苍生鼎沸典午兴亡卜在深源一人耳厚兄弟用甘一死以售功售名售义售知己故比见阁下以求其所也王彦章有言人死留名豹死留皮史臣谓其真忠蓋天性也厚樵自卜其兆若胡越相视则知人岂真易哉阁下筦枢庭为天子大臣厚樵风尘布衣在天地间一蝼蚁数当代文伯阁下寔司之厚樵未许籍衙官列阁下出入三朝为时元老厚樵黄嘴经生耳且闽蜀相距弥万里远近之相悬贵贱之相悬贤不肖之相悬先进后学之相悬其间事宜百数駟举烽燧传呼不相及者何以三见问而分不间毛髮蓋磁石取鉄以气相合固有不期然而然者今既蜗吝蠡浅不逃鉴裁当展尽底里以俟采择厚逸迈而痴樵幽防而愚厚痴絶樵愚絶厚于世俗有领袖樵于人物有林藪厚见理如破竹迎刃而解初无留手樵见理如攻坚木终自擘折稍迟耳厚于文如狂澜怒涛滚滚不絶樵于文如悬嵯絶壁向之瑟然寒人毛骨厚仰视韩愈如不及樵下视李白如常人厚下笔如迅马歴陇陂终日驰骋而足不顿且无蹶失樵下笔如大匠抡材胸中暗有绳墨每作文文成自不晓其义必求厚为之解说然后胸中晓然者厚常曰吾弟文章合有神助不然何得乃尔厚得之易得樵而后峻樵得之纷得厚而后理厚得樵而城壁固樵得厚而朱紫分厚贞粹之地可容樵千万辈而峰岨孤峭樵自出厚之右厚应辨多方畧樵迟钝有隠思厚临仓卒若素成绰有余波樵临仓卒若暴疾昏黄徐而图之了无一尘相累使厚司台諫则世无豺虎迹使樵直史苑则地下无冤人智解文锋气挫虓虎使于四方不辱君命则厚优于樵正固干事不避鎔镕能辛苦其身为纪纲先樵亦优于厚当官正色不畏强御则厚优于樵小心事君缙绶朝夕樵亦优于厚至当庙廊拥幼君当大节而不可夺则厚能之樵亦能之临财廉取与义出入无私交之行可为百僚则厚能之樵亦能之斟酌治体如扁鹊治疾尽见五脏凝结解纷排难如庖丁鼓刀无少留刃厚能之樵亦能之厚也樵也平昔囊柜中短长不出此耳推短论长于阁下有望焉古者将门必有将相门必有相故萧何之于韩信羊祜之于杜预王导之于纪瞻李勣之于戴胄皆相首尾以成功名厚樵生平用心于古人阁下亦以

古人许可幸犬马之齿未在桑榆正当戮力周旋阁下着一鞭于中原使白骨更生寒灰复燃特反掌耳惟阁下置之肝臆而终始之

与景韦兄投江给事书

国有可贺而吊可吊而贺者士有若达而穷若穷而达者此理甚明而甚幽甚微而甚着知者或失之十五愚者或得之十一得失之机间不容髮请为阁下开叙其端厚樵莆阳田家子也亦经生也非愚非智所恃者胸中无膏肓之疾解纷排难洞肝彻臆遇不平事则热中振衣達旦不寐奔往掉赴若将后时用持此說蹶屣担簦不避风雨求见通人而论之得通人则论不得通人则不论也当海宇晏清方隅宁谧长扬羽猎鬪鷹走狗吳姝荆艷尽态极妍时也人以为可贺厚樵以为可吊白刃云屯苍生鼎沸天子蒙尘百官连颈宫中生棘雨露霑衣时也有人以为可吊厚樵以为可贺昔冯道驰马之喻得之矣懷黄金带紫绶乘肥马廕广厦美食大观重门高第凡此之輩人以为达厚与樵以为穷面色黧黑形神潦倒朝夕藜藿不计饱暖凡此之輩人以为穷厚与樵以为达昔韩退之放荆潭诗序得之矣冯道为河东掌书记时奉使山中过井陘之险跃马蹶蹶不敢怠衒及至平地谓无足虑遽跌而伤此无他蹈危者虑深而获全居安者患生于所忽人之情也请以建武天寶之事以明之开元之际太平之日梨园穷丝桐之妙骊山极土木之役自以为太平磐石之固子孙万世帝王之业也岂意祸起萧墙奸生帷幄嫫媧鱼肉乘輿播迁蜀山秋草相对何心厚与樵所谓可贺而吊蓋已然之明驗也火德中微贼臣内擅黄巾赤眉连山亘谷四方之盜如云而起人谓汉家血食于此已矣世祖赫愤南阳徒步奋呼天下不约而从者摠百万之师使高祖之业不絕如线未几建武之隆颂声洋溢岂天意哉或人力也厚樵所谓可吊而贺已然之明驗也退之尝曰和平之声淡泊哀思之声要妙懽愉之词难工穷苦之言易好此无他憔悴起哀思膏粱生痼疾人情之常也请借诸葛王衍之事以明之典午衣冠以浮虚相诞而夷甫以风流儒雅独成门户雍容风格洒落人耳目间以为云天上人矣及临小患害低头畏避莫敢支吾頽墙之祸殒身赤族此夷甫之达厚与樵得而穷之也诸葛武侯琅琊田翁也躬耕陇亩风日刺其肌蔬粢攻其肠防防然旷四海若不容其軀一旦感防于草庐中谈笑而取岷蜀君臣相遇以鱼水为不若何其一身计之而不足天下计之而有余此武侯之穷厚与樵得而達之也以往鉴今正国家可贺之辰而羈旅求达之秋然敌国未羈亭障未肃皇图未复调发未弭父兄之耻未洒天地愤容日月夺色至尊宵旰貔虎枕戈亦上下愁蹙之时也以厚与樵观之劲敌不足忧弱卒足忧贫贱不足忧富贵足忧则为厚与樵者易为阁下计者难矣蓋艰难之主勤勤则易晓战胜之兵骄骄则易败厌乱之俗易成饥渴之民易得况以邊骑之五不当中国之一驱饮愤之民仗义奉辞以吾多箠制彼无箠以吾重地制彼散地以吾銳气犯彼归气吾专为一彼分为十取用于国因粮于敌险其势短其节如转圜石于千仞之山纵不能正藁街之戮长纓之羈亦足以攄生灵之愤刷祖宗之辱两宫帐殿必不寥寥于穹庐沙漠之乡也为国计者不亦易乎若今日之兵教导不明典刑不正溺于疲将之手持之失其纪律进无銳意君有乱心驭之则乱不驭亦乱驭之其乱速不驭其乱迟信乎为兵计之不易也厚与樵野人也身不紆君之绂口不膏君之粟得志则行其义不得志则肥遯山林一丘一壑一觴一咏下视势利如摆脱鸿毛耳为厚与樵计者不亦易乎若阁下衣人之衣懷人之忧乘人之车载人之患食人之禄死人之事当此时也不能垂尺寸功名以自効使国家无环视之责而臣子之心所以自为者宜何如信乎为

阁下之难也然人之所以忧者亦不足忧为国计固易为兵计不难为厚与樵计固易为阁下计亦不难与其进也则狂瞽之见庶裨万一以所为难者而为易若反手耳奈德厚信至而未达不敢 辞以求媚如其不遇则天也命也夫复何言且为阁下言之峨冠带曳裾投刺者或挟亲而见或挟故而见或阶縁亲故先容而后见也迹相仍袂相属也然有画一竒吐一防为阁下计者乎有人于此亲非崔卢故非王贡又无左右介绍为之先容敢仗天下大计堂堂求见阁下谓此人胸中当何如哉世有非常之难又有非常之功又有非常之人岂常人所能赏鉴哉厚与樵见今之士大夫齷齪不图远畧无足与计者用自献于阁下昔萧何引韩信于行伍邓禹荐寇恂于偏裨周瑜定交鲁肃于阆阁元直推穀孔明于陇亩厚樵诚有望焉呜呼羽毛既成因风而腾鳞甲已就待云而兴厚樵风云阁下寔司牧之